

COLUMNA

Da vaschias e borlas

ROMAN CAVIEZEL

Tge bel temp che quai era, cur ch'ina vaschia era anc simplamain in chaviertg en furma da culla, emplenì cun aria u liquid! Liada stretgamain cun il corp uman, vegniva ella magari in zic tabuisada perquai che sia controlla po d'aver in problem. Dentant datti er quels che din che la scuffa saja in spievel da l'olma, gea ch'ella «bragia» – bel, navair? – cur ch'ella daventa pli flaivla, culs onns, e lascha mitschar ina giada u l'otra in larmin. Per ils pertutgads franc in vair rumpatesta; da l'otra vart consolescha il fatg che, tenor studis scientifics serius (forsa encunter tut las spetgas), ina dat betg differenzas tranter umens e dunnas. Almain qua ina tscherta egalitad.

Ozendi è tut blerun pli cumplitgà. En il mund modern datti vaschias, scuffas, borlas e cumpagnia enfin ch'ins vesa: da filter, da bursa, dad internet ... da google, da facebook, da savun ... gea da tut tge che ti vuls. Ils spezialists las numnan bubbles, precis sco ils Bubble Gum Bazookas (sche pussaivel pronunzià a la rumantscha u tudestga), vus savais schon, quels schlogns ch'ins po uschè



bain vilentar ils geniturs e magisters cun suflar si e laschar schluppegiar. Dal «spievel da l'olma» è deplorablamain restà bunamain be il chaviertg. E forsa la tema che la scuffa possia schluppar insacura e chaschunar la catastrofa. Basta.

Sche la vaschia originara era per definiziun tendenzialmain dadens il corp uman ed individuala, è la vaschia moderna per regla dadora e per uschè da dir sociala. I sa tracta damai d'ina spezia da contenitur che enserra plirs individis che sa sumeglian e sa sutta-mettan da libra voluntad a reglas stabilidas dad instanzas externas. In bun exempel èn las partidas, u las baselgias. E per consequenza na dovra nagin far insatge sco gimnastica dal fund da la batschida per enfirmir sia

vaschia. Simplamain perquai ch'ella è perfecta uschia sco ch'ella è. Sche ti es per exempel en la scuffa da l'SVP, na vas ti tuttenina betg a crititgar la dunna Martullo, ti giadas tia dependenza e taschas.

Mia vaschia preferida è quella da filter tar Facebook. Jau l'hai tschernida pervi da la persunalisaziun totala ch'ella porscha. Vus na pudais betg as imaginar quant bel che quai è d'avair da far adina be cun gliud che patratga medem sco jau, da sa sentir pupragnà e manipulà en moda e maniera uschè simpatica. Avugadaziun? Mai e pli mai! Anzi. Jau giad mintgament da betg stuair reflectar mez. Chalur ed armonia ma circundeschan e charezzan ad in charezzar, sco en il venter da la mamma. Sche jau dun tut, survegn jau enavos anc dapli. Grazia ad in algoritmus sa quella schizunt tge products che jau dovrel, u tge marca che jau hai pli gugent. Genial, navair? Ina dumonda avess jau tuttina: Pertge survegn jau trasor reclamas da pampers? En mia vegliadegna! Forsa ma po responder il signur Zuckerberg?

Roman Caviezel è stà scolarist gimnasial.